

RED ta haya Rudy Lampe

## Un Arubiano cu curashi

**AÑA** pasa, dr. Rudy Lampe a wordo retira for di su funcion como sacerdote, eronicamente net ora e tabata recordando 25 aña cu el a celebra su prome misa como sacerdote. E retiro di e sacerdote Rudy Lampe a sosode cu palabranan di bon deseo y bendicion pa futuro.

Pero awe, enbes di a ricibi nan bendicion, e mesun hendenan aki a deshaci di dr. Rudy Lampe mescos cu ta sushi nan ta tir'afo sin tene cuenta cu e ta un ser humano cu lo keda biba riba e mundo aki hunto cu nan.

Sin cu el a comete un of mas delito of acto contra nos leynan, esnan cu ta pretende di ta sinta na man drechi di Dios a scoge pa condena Rudy Lampe

manera un criminal y a prohibi'e di traha of duna les na tur organisacion of universidadnan cu ta basa riba nan religion, esta tur instituto Catolico, no na Aruba so, pero na henter mundo. Di acuerdo cu RED den un comunicado, dr. Rudy Lampe a wordo condena solamente pasobra el a funciona como Representante di Pueblo den Parlamento di Aruba, despues di a wordo eligi democraticamente cu votonan preferencial durante un eleccion legitimo.

Eronia di bida ta cu Rudy Lampe, cu semper a sigui Cristo como su ehempel den bida, a wordo condena y crucifica - aparecido na Cristo - sin cu el a

comete un crimen y dor di hendenan cu a prefera di laba man di e asunto aki y punta dede riba otro nan.

Durante mas cu 10 aña como sacerdote, dr. Rudy Lampe a muestra cu nos Status Aparte a trece cu n'e cambionan cu a crea e oportunidad pa gobernantenan actua sin control adecuado.

El a prueba cu sin debido control di nos institucionnan - manera Parlamento, Rekenkamer, Raad van Advies, Centrale Accountants Dienst (CAD), etc. - riba gobernacion, porta ta habri pa actonan indeseabel tuma lugar, actonan cu ningun sociedad civilisa por of mag di acepta.

Di acuerdo cu RED, el a tuma como un di su tareanan den bida, pa cuminsa alerta y muestra pueblo cu ora un pais tolera corrupcion y soborno, ta pueblo lo sufri, pasobra bienes cu mester bay pa yuda pueblo ta simplemente desaparece.

Den su esfuerso pa habri wowo di pueblo el a organisa charlanan manera "Cultura di Miedo" y el a introduci "Transparency International" na Aruba.

Rudy Lampe a organisa tambe un partido politico a base di integridad y servicio na pueblo sin busca beneficio propio. El a bira Parlamentario y el a trece, den luz di dia, un cantidad grandi di abusonnan cu tabata sosode cu placa di pueblo, manera "pension cu 45 aña", biahamento luhoso y excesivo, etc.

Dr. Rudy Lampe a demostra di ta un Arubiano cu mihor caracter, mas curashi, mas inteligente y tambe cu ta un mihor hende cu esnan cu a conden'e solamente pasobra el a sirbi su pueblo Arubano den Parlamento.

Sin duda Rudy Lampe a keda herida, pero e ta un hende cu hopi fe, hopi amor pa su pueblo y hopi gana di sigui lucha pa su pueblo y no pa su mes beneficio. Sin duda Rudy Lampe lo recupera di su heridanan y lo sali cu mas forza pa enfrenta su futuro. Partido RED Democratico ta para firme su tras y lo sigui apoy'e den su lucha pa su pueblo di Aruba.